

PROGRAM STIPENDIRANJA - EUROPSKI FORUM ALPBACH

Austrija, 16.08. - 01.09.2012.

Inicijativna grupa Alpbach Sarajevo (IGAS), pridruženi član Evropskog foruma Alpbach Vas poziva da se prijavite na program stipendiranja Evropskog foruma Alpbach:

ŠTA JE EVROPSKI FORUM ALPBACH?

Evropski Forum Alpbach (EFA) je najznačajnija austrijska konferencija koja se svake godine održava u augustu/septembru i traje u prosjeku dvije i pol sedmice. U ovom periodu imate mogućnost da prisustvujete odabranim seminarima i simpozijima ili ljetnoj školi.

Ove godine EFA će se održati u periodu od 16. augusta do 1. septembra.

Krovna tema EFA-a 2012. jeste: **Očekivanja – budućnost mladih** (*eng. Expectations - The Future of the Young, ger. Erwartungen - Die Zukunft der Jugend*)

Zvanični jezici EFA su engleski i njemački.

Mjesto održavanja EFA je alpsko selo ALPBACH koje se nalazi u austrijskoj pokrajini Tirol (između Salzburga i Innsbrucka).

Voditelji ljetnih škola, seminara i simpozija su ugledni evropski i svjetski znanstvenici, profesori, stručnjaci, diplomate i državnici.

KO SE MOŽE PRIJAVITI I KOJI JE ROK ZA PRIJAVU?

Na aktivnosti EFA i *Ljetnu školu o Evropskim integracijama* mogu se prijaviti studenti i diplomci do 30 godina, dok se na *Ljetnu školu o Evropskim zdravstvenim i društvenim sistemima u tranziciji* mogu prijaviti svi zainteresovani, bez ograničenja vezanih za dob ili profesiju.

Vrste stipendija za koje se može prijaviti:

- stipendija za generalni program EFA tj. simpozije i seminare
- stipendija za jednu od dvije ljetne škole

Bitno je naglasiti da se prilikom prijavljivanja možete opredijeliti samo za jednu od dvije ponuđene mogućnosti, obzirom da se EFA generalni program i ljetne škole se odvijaju paralelno.

Rok za slanje prijave je 08.05.2012.

KAKO IZGLEDA EVROPSKI FORUM ALPBACH?

Dva najvažnija događaja koji se paralelno odvijaju u Alpbach-u su:

a) Generalni program Forumu Alpbach, koji se sastoji iz dva dijela:

Seminar Week je prvi dio EFA, i sastoji se iz šest dana od kojih se svakog održava jutarnji i popodnevni seminar (nedjelja je slobodna). Teme seminara variraju, s tim da se sve fokusiraju na generalnu temu ovogodišnjeg EFA "Očekivanja – budućnost mladih". Stipendisti prisustvuju seminarima koje odaberu, te na kraju dobiju certifikat o pohađanju. Odabirate jedan seminar za prijedodne i jedan za poslijepodne. Prve subote po vašem dolasku u večernjim satima održava se prezentacija svih seminara i predavača, što vam može pomoći da odaberete seminare koje želite pohađati. Seminar Week se održava u lokalnoj školi (tzv. *Hauptschule*). Seminar Week traje od 16. augusta do 22. augusta 2012. godine, a programom je predviđeno 16 tema.

Seminari pod rednim brojevima od 1 do 8 se održavaju u jutarnjim satima, tj. od 9:00h do 12:00h (izuzev nedjeljom), dok seminari pod rednim brojevima od 9 do 16 se održavaju u poslijepodnevnom satima, tj. od 14:00h do 17:00h (izuzev nedjeljom). Organizatori u mjesecima pred početak EFA na svojoj oficijelnoj web stranici objavljuju detaljan opis tema, kao i spisak predavača.

Po završetku Seminar Week počinje drugi dio EFA, čiji je sadržaj obogaćen simpozijima. **Simpoziji** su višednevna predavanja i paneli na specifične teme koje vode stručnjaci iz relevantnih oblasti. Održavaju se u salama Kongresnog centra EFA (centralna zgrada za sva dešavanja i informacije), i traju od kraja Seminar week do završetka Foruma. Učesnici mogu da idu na one simpozije za koje su najviše zainteresovani.

b) Dvije ljetne škole - intenzivno specijalizirani programi, koji se održavaju paralelno sa programom EFA. Ovogodišnji datumi održavanja i teme ljetnih škola su:

16.-30.08.2012 Alpbach Summer Schools on European Integration

16.-23.08.2012 Summer School on European Health Care and Social Systems in Transition

Obratite pažnju da je aplikacioni proces na ljetne škole nešto drugačiji od aplikacionog procesa na generalni EFA program. Detaljne informacije možete dobiti na linkovima koji se nalaze u dnu ovog info letka.

Vrijeme nakon nastavnih aktivnosti učesnici mogu da iskoriste za uživanje u prirodi Alpbacha, te da učestvuju i prisustvuju različitim kulturnim događajima pripremljenim upravo za njih. Popratni sadržaj uključuje koncerte, clubbing, izložbe, izlete u Innsbruck, Swarovski muzej, radionice, fireside talks, te druge aktivnosti organizovane od strane drugih inicijativnih grupa.

Inicijativna grupa Alpbach Sarajevo (IGAS) će svojim savjetima i znanjem pružiti osnovu da svi stipendisti iz BiH provedu kvalitetno i prelijepo vrijeme u Alpbach-u.

ŠTA POKRIVA JEDNA PUTNA STIPENDIJA?

Stipendija pokriva: smještaj s doručkom, kotizaciju, a dosadašnja praksa je bila i ta da se BiH učesnicima davao prikladan džeparac, po svakom danu provedenom u Alpbachu.

Troškovi prijevoza iz Sarajeva do Alpbacha i natrag **nisu** pokriveni stipendijom, te ih snose stipendisti lično.

KAKO DA SE PRIJAVIM NA PROGRAM STIPENDIRANJA?

Formulari za prijavu mogu se preuzeti sa oficijelne stranice EFA: **www.alpbach.org**

Pored formulara za prijavu u koje unosite lične podatke, a koje popunjavate na računaru i zatim štampate, potpisujete i šaljete poštom na adresu Evropskog foruma Alpbach u Beču (adresa se nalazi na formularima), potrebno je priložiti i CV i motivaciono pismo. Upute za motivaciono pismo naznačene su na formularu za prijavu. Vaš CV ne bi trebao biti duži od dvije stranice. Možete ga napisati na engleskom ili njemačkom jeziku, a mi preporučujemo da obratite pažnju na njegovu gramatičku i pravopisnu ispravnost.

Uz Vašu prijavu možete priložiti (nije obavezno) diplome i certifikate, a ukoliko se prijavljujete za ljetnu školu i preporuku, po mogućnosti od osobe iz akademske zajednice. Kod dokumenata koji nisu na engleskom jeziku, na poleđini kopije odštamajte prijevod na engleski jezik.

EFA će o finalnoj selekciji obavijestiti sve aplikante putem e-mail-a i/ili regularnom poštom, najkasnije početkom jula iste godine. Stipendisti su obavezni potvrditi svoj dolazak.

Za više informacija posjetite:

www.alpbach.org

www.igas.ba

IGAS Facebook Fan Page

Ili nas kontaktirajte na info@igas.ba



Initiative Group Alpbach in Sarajevo

